

't Herenhoentien

Beste Kiender!


Veur jim is dit kraantien.
Et kraantien hiet et
Herenhoentien.
Weten jim wel wat een
herenhoentien is?
Et is een lievenheersbesien.
Wi'j vienen et herenhoentien
een lief en mooi besien.
Daoromme hebben we et
kraantien naor him nuumd.
Et Herenhoentien komt drie
keer in et jaor naor jim toe.
De eerste keer vlak veur de
kastvekaansie. De twiede keer
komt hi'j in et veurjaor. En de
dadde keer komt et Heren-
hoentien vlak veur de zomer-
vekaansie. Now weten wi'j
wel dat jim zels nog niet lezen
kunnen. Daoromme moe'n jim
jim juffer of meester of mem
of heit mar es vraogen. Die
willen jim vast wel es now en
dan uut et kraantien veur-
lezen. Of misschien wel je
omke of tante. Of je ooldere
breurtien of zussien! Mar d'r
staon niet alliend verhaelties
in et Herenhoentien. D'r staon
ok tekenings, spullegies en

een kastlietien in.

In de midden van de kraante
zitten twie hiele mooie
prikplaeten. Op de iene staot
een kaststallegien. Dat kast-
stallegien kuj' eerst kleuren en
dan uutprikken. Aj' dat daon
hebben kuj' de beide
ziedkaanten naor veuren
volen. Et kaststallegien blijft zo
mooi staon. Mar d'r moet
vanzels ok wat in et
stallegien.

Daoromme zit d'r nóg een
prikplaete in et Herenhoentien.
Daor staon Jozef en Maria op
tekend. En et poppien Jiezus
in de kribbe, en twie
schaopies Die kuj' ok allegere
kleuren en uutprikken. De
onderste stökkies an de
feguurties kuj' ommevolen.
Dan kuj' ze zo in et stallegien
zetten. D'r zit ok een kleur-
plaete van Piepmoes in jim
kraante.

Zuuk de 5 verschillen.



Aj' die kleuren en opsturen kuj' daor mooie priezen mit winnen. We hebben drie priezen veur groep 1 en drie priezen veur groep 2.

D'r is vanzels een deskundige jury. Die zal de mooiste kleurplaeten uitzuken.

De jury bestaot uut Jan de Vries, heufd ofd. onderwies van de gemiente West-Stellingwarf, Victor Felder, heufd ofd. onderwies van de gemiente Oost-Stellingwarf

en Sietske Bloemhoff, heufdmitwarker van de Stichting Stellingwarver Schrieversronte, ofd. hiemkunde en woordeboek, en van huus uut lereres tekenen.

De kleurplaeten moe'n uterlik 15 jannewaori 1992 binnen wezen. Jim kun ze opsturen naor de

Stichting Stellingwarver Schrieversronte,
Postbusse 138,
8430 AC Oosterwoolde.

Jim meugen ze daor vanzels ok henne brengen. De Schrieversronte zit in de Meulehoeve, Bongheer 1, vlakbi'j de sporthal. Mar jim meugen ze liekegoed inleveren op et gemientehuus in Wolvege of Oosterwoolde. Doe jim best! Wi'j weensken jim een hiele plezierige kastvekaansie en een gelokkig ni'jjaor toe!
 De groeten, tot kiek!



KASTFEEST

Tekst: Johan Veenstra
 Mez.: Henk Bloemhoff

Kastfeest is nog e-ven waachten en dan is et
 jaor veur - bi'j. Kastfeest dat is vri'j van schoe - le
 en mis - schien wel ies en sni'j. Kastfeest is een
 gro - te kastboom: een peer lo - chies in de naacht.
 't Bin de hu - ders bi'j de schao - pen.
 Vai - lig ho - - len die de waacht.

KASTFEEST

- 1) Kastfeest is nog even waachten en dan is het jaor veurbi'j. Kastfeest dat is vri'j van schoole en misschien wel ies en sni'j. Kastfeest is een grote kastboom, een peer lochies in de naacht. 't Bin de hunders bi'j de schaopen, veilig hollen die de waacht.
- 2) Kastfeest dat is huist mit beigies en misschien een goed rappot. Kastfeest is de braoden gaanze, feest'lik eten op jow bod. Kastfeest is een waarme kerke, meensken zingen overal: Hoest twie duzend jaoren leden kwam een kientien in de stal.
- 3) Kastfeest is een oude kastman, die kedogies bi'j him het. Kastfeest is et feest van vrede... prakkesaasies, een gebad. Kastfeest dat bin duzend klokken, bim-bam-beierend in 'e wiend. Kastfeest in de hiele wereld is Maria mit heur kiend.



PIEPMOES EN DE KASTBOOM.

(Veurleesverhael en tekenings deur Sietske A. Bloemhoff)

Et is december. Et is roetkoold. Die nacht is d'r een dik pak sni'j valen. De sloden bin hielendal bevreuren. Op de Lende bin de kiender drok an et rieden. Ze hebben een protte wille, dat kuj' begriepen. Et is kastvekaansie en d'r ligt ies en sni'j, wat wi'j' nog meer! In haost alle huzen staot al een kastboom.

In de bos vlakbi'j et dörp staot Piepmoes te kieke. "Wat liekt zoe'n versierde boom in huus toch mooi," daenkt et moesien. "Ik wol ok wel een kastboom in mien kesteel! Weej' wat? Ik gao de bos in en zuuk een mooi klein boompjen uut. Thuus he'k nog wat zulverpepier. Daor kan'k mooie slingers uut knippen. En ik hebbe ok nog wel een peer ekkels over. Daor kan'k wel wat van dat pepier om henne doen. Dan he'k ommes ok mooie ballegies in mien boom. Wat zal mien neve Matten opkieken as hi'j mit de Kast uut-van-huus komt!"

Bliede stapt Piepmoes de bos in. Hi'j fluit een wiesien. Weej' wel wélk wiesien? Et is et kastlietien dat ok in dit kraantien staot. Dá's toevallig!



Mar lao'we mar gauw kieke of Piepmoes al een kastboom het. Nee heur. Kiek daor lopt hi'j. Zonder kastboom. Now en dan schuddet hi'j de sni'j van een boom. "Nee," zegt hi'j. "Alweer mis. Dit is een ekkelboom, daor he'k niks an." Et vaalt niet mit veur de moes om een kreers kastboompjen te vieren. "Au!" foertert et moesien. "Now he'k zoe'n stiekelige hulzepolle te pakken." En Piepmoes lopt weer verder.

Mar Piepmoes is niet alliend in de bos. Een aentien achter him lopen nóg twee beesten. Et iene beest is haost hielendal zwat. Op zien stat het hi'j een wit tippien. Et ere beest kuj' haost niet zien. Mar ja, dat beest is ok haost hielemaole wit. En een wit beest in de witte sni'j kuj' niet zien. Alliend et tippien van zien stat ziej' henne-weer gaon. Dat komt deurdat dat tippien zwat is.

Jim weten vanzels al lange wie et binnen. Krek! Et zwatte beest mit de witte punte op de stat is Klaos de kaeter. Klaos is de grootste vi'jaand van Piepmoes. Et witte beest mit de zwatte punte op de stat is Miep. Miep is Klaos zien vrundinnegien. Ze zitten vanzels weer es achter Piepmoes an.

"Piepmoes het niks in de gaten, Klaos!" mauwkt Miep.

"Nee, dat daenk ik ok niet," gromt Klaos. "Mar wat dot die moes toch nuver. Waorom zol hi'j toch de sni'j van de bomen schudden? Moezen bin toch mar appatte beesten heur. Et beste is en eet ze op!" En zo sloepen de beide katten verder achter de moes an.

Mar d'r bin nóg meer beesten in de bos. Kiek mar es omhogens. Vlak boven de katten flodderen twee voegels. Et iene voegeltien is aorig geel. Et is de gele gouwe. As hi'j zingt heur ie dudel-jo-ho. Mar hi'j zingt now niet. Eers zollen de katten him ja heuren!

Et ere voegeltien is van veuren aorig rood. Juust, et is et roodbossien. Beide voegelties bin vrunden van Piepmoes. Ze helpen Piepmoes hiel vaeke mit klussies. Of as de katten achter Piepmoes an zitten. Now zullen ze Piepmoes ok wel helpen moeten, daenken jim niet?

"Dit komt niet goed," kwettert et roodbossien zachies. "Die verhipte katten bin weer van plan om Piepmoes te pakken, ziej' wel?"

"Ja," zegt de gele gouwe. "En Piepmoes het niks in de smiezen. Hi'j lopt mar kastlieties te fluiten en let alliend mar op kastboompies."

De voegels praoten nog een posien over wat ze doen moeten om Piepmoes te helpen. Dan vliegen ze hadde achter de katten an. Now en dan pakken ze wat sni'j. Van die sni'j maeken ze allebeide een hiele dikke sni'j-balle. Wat zollen ze toch van plan wezen?



Piepmoes het eindelijk een kastboompjen naor et zin vunnen.

"Hè, hè', poest hi'j. "Disse moet et mar wodden. Dit is een prachtige boom."

Hi'j schuddet de sni'j nog wat beter van de boom of en begint te kappen. Tjonge jonge, dat vaalt niet mit heur. Piepmoes kapt en kapt en let nargens eers meer op as op de stamme van de kastboom.

De beide katten bin al vlakbi'j Piepmoes.

"Now Klaos, now moet et haost lokken kunnen," mauwkt Miep. "Iene sprong en we hebben him. Wat zal die moes lekker smaeken mit de Kast. Wat een lekker Kastmaol!"

"Ssst, stil now Miep," blaost Klaos. "Douk heurt hi'j oons nog. Let op! Ik telle tot viere en dan springen we boven op die dikke moes. Iene... Twieje...



Klets! Plof! Wat is dat? Wat gebeurt d'r? Hebben de katten Piepmoes te pakken?

Nee heur. Mar wat is d'r an de haand?

Daor liggen werempel de beide katten languut in de sni'j. En over heur henne ligt ok allemaole sni'j! Twie hiele dikke sni'jballen bin percies op heur daele kommen! Et roodbossien leut een sni'jballe op Miep valen en de gele gouwe iene op Klaos de kaeter.

Raozen en mierken dat die beide katten doen! Niet mooi meer!

"Au, au," raost Miep, "ik zie allegere steerns, en et is iens gien naacht!" "Ik zie ok allemaole steerns en in alle kleuren!" jammert Klaos. "Wat is d'r toch gebeurd? Au, au!"

De katten vliegen overaende en mit de stat in de krul maeken ze dat ze vot kommen.

Ze zaggen vanzels niet dat et roodbossien en de gele gouwe heur uut zitten te lachen. Ze valen haost uut de boom, zó moe'n ze lachen!

En Piepmoes? Die kikt veraldereerd om him henne. Dan zicht hi'j de voegelties en krigt in de gaten dat die twie him weer es hulpen hebben. "Dank je wel voegels!" zegt hi'j. "Mar goed dat jim krek in de buurt weren! Weten jim wat? Kom mit de Kast ok mar bi'j mi'j. Dan zal ik jim op lekkere neuties en beigies trakteren. Ik hebbe genug!"

De voegels helpen Piepmoes om de kastboom naor zien kesteel te slepen. Onderwegens fluiten ze et kastlietien mit zien drienend.

Klaos en Miep fluiten vanzels niet. Ze kimmeneren ommeraek. Ze hebben allebeide een dikke bulte op et heufd. Now ja, eigen schuld...

De 5 verschillen



't Herenhoentien

Uitgever:

Intergemientelike Begeleidingsgroep
Hiemkunde in Oost- en West-Stellingwarf

An dit Herenhoentien warkten mit:

Jan de Vries

Bart Beltman

Saskia Douma

Sietske Bloemhoff



